

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA LAITI

FEPUARI – IUNI

2024

FAASOLOGA O MATAUPU

<u>ASO/ MASINA</u>	<u>MATAUPU</u>	<u>TUSI FAITAU</u>	
1. Aso Sa Fepuari 04, 2024	E manuia le tagata ola finau	Kenese – 32: 19 – 32	
2. Aso Sa Fepuari 11, 2024	E leaga le ola pepelo	2 Tupu – 5: 20 – 27	
3. Aso Sa Fepuari 18, 2024	O le tagata faufaleaga ma laugutu faaoleole, e iu i le malaia	Faataoto –18: 4 -8 26: 23 - 28	
4. Aso Sa Fepuari 25, 2024	Mataupu faamanatu		
5. Aso SaMati – 03, 2024	O le valaauina o uluai soo o Iesu	Luka – 5: 1 – 11	
6. Aso Sa Mati – 10, 2024	Aua le ola faafoliga	Isaia – 58: 1 – 8	
7. Aso Sa Mati – 17, 2024	E taugata le alofa moni	Ioane – 12: 1 – 11	
8. Aso Sa Mati – 24, 2024	Ua latou fola laupama I le ala (ASO SA LAUPAMA)	Ioane – 12: 12 – 19	
9. Aso Sa Mati – 31, 2024	Ua toetu le Alii (ASO SA O LE ESETA)	Mareko – 16: 1 – 18	
10. Aso Sa Aperila 07, 2024	Ia outou fafaga ia I latou	Mareko – 6: 30 – 44	
11. Aso Sa Aperila 14, 2024	Alu ma usitai e talia le valaaua a le Atua Esoto – 2: 13 - 35		
12. Aso Sa - Aperila 21, 2024	Faalogo ma talia fautuaga a tagata matutua 2 Nofoaiga Tupu – 10: 1 – 19		
13. Aso Sa Aperila 28, 2024	Mataupu Faamanatu		
14. Aso Sa Me 05, 2024	Ua faapogisaina mata o e le talitonu	Luka – 24: 13 – 35	
15. Aso Sa Me 12, 2024	O Tepora le uluai tina na fai (ASO SA O TINA) ma taitai ia Isaraelu	Faamasino – 4: 4 – 10, 12 – 15	
16. Aso Sa Me 19, 2024	O se taitai lelei na te lagonaina lona faatauva	1 Tupu – 3: 4 – 15	
17. Aso Sa Me 26, 2024	Mataupu faamanatu		
18. Aso Sa Iuni 02, 2024	A valaauina oe e le Atua, tulai ma alu loa	Ieremia – 1: 1 – 19	
19. Aso Sa Iuni 09, 2024	Ia tatou faamaoni e avea ma molimau a Keriso. Ioane: 1 – 10		1
20. Aso Sa Iuni 16, 2024	Ia faatino lou alofa atu ae le na o upu.	1 Ioane – 3: 18 – 24	
21. Aso Sa Iuni 23, 2024	O le leoleo mamoe lelei	Ioane – 10: 7 – 16	
22. Aso Sa Iuni 30, 2024	Mataupu faamanatu.		

MANUIA GALUEGA O LENEI TAUSAGA

ASO SA – FEPUARI 04, 2024

MATAUPU: “ E MANUIA LE TAGATA OLA FINAU”

TUSI FAITAU: KENESE - 32:19-32

SINI: Ia malamalama fanau o le finau mo mea sili e i’u i le olaga manuia. A’o ia finauga uma ia tu’u a le Atua i luma e tau ai i manu fa’amoemoega.

FESOASOANI MO LE FAIAOGA: Malo le soifua malo le onosa’i i le amataina fo’i o galuega fa’a faiaoga Aso Sa o lenei tausaga fou. Manatu lava e le faigofie ona soso’o aso fiafia ma le toe fo’i i le fa’agasologa o aoga Aso Sa o lenei tausaga. O le faiga masani lava e amata e lau Susuga i se tatalo, ona soso’o lea ma ni nai fesili i fanau; Pe a mai le tu’uaga, pe sa fiafia po’o iai fo’i nisi o fa’anoanoa? Manaia fo’i le mulimuli pea i le Tusi Faitau ma fa’amasani tamaiti e faitau ma malamalama i uiga o upu o lo’o faitauina. Ia, o lo’o i lau Susuga lava le faitalia i le faiga o le mataupu, ‘ae lelei tele pe a fa’ailoa i fanau le uiga o le upu manuia ma le upu finau. O le a le mea e tupu pe a e ola finau? Manuia le fa’amalamalamaina o le mataupu o lenei Aso Sa.

SINA FESOASOANI MO LE MATAUPU: E manuia le tagata ola finau, o le mataupu lena o lenei Aso Sa. Fai mai le tala ua manatu Iakopo e fo’i e toe fa’alelei ma lona uso o Esau, manatua fo’i le mea na fai e Iakopo ma lona tina na mafua ai ona sola ese ma le aiga. Lea ua ola le fanau a Iakopo, ua tele fo’i ana manu ma oloa ma ua ia manatu ai, o le a fo’i i lona aiga. Sa alu Iakopo ua momoli ana ava e to’alua, ma ana auauna fafine e to’alua fo’i, atoa ma lana fanau e to’a sefulu ma le tasi, ma ana mea uma i le tasi itu o le alia o Iapota. E le’i alu Iakopo fa’atasi ma i latou, fai mai o le taimi lea na la fagatua (tauivi) ai ma le tagata, ma ua o’o a i le ao o fai pea tauiviga a Iakopo ma le tagata lea aua o le po lea e fai ai iviga. Sa taumafai le tagata lea e sola ese ma Iakopo a ‘ua le mafai. Na fa’aletonu le suilapalapa po’o le fa’iga o le vae o Iakopo, ona fai ane lea o le tagata, tu’u mai ia a’u se’i o’u alu ua ao. Peitai ua le mafai, ua finau atu pea Iakopo, lea na ia tali atu ai; Leai, ou te le tuuna lava oe e te alu, se’ia e fa’amanuia mai ia te a’u. O le mea moni ua suia le igoa o Iakopo ia Isaraelu, (O le Ali’i o ia o le Atua) ma ua ia fa’aigoa le fanua ia Penieli, (o lona uiga, O fofoga o le Atua) aua o le fanua lea ua manatu Iakopo na iloa ai le Atua, ua la fesaga’i ma ua fa’amanuia le Atua ia te ia i lea mea. O le i’uga lena na o’o ia Iakopo, na manuia ina ua fa’amanuia iai le agelu na la fagatua, (tauivi) ‘ae na mafua ina ua ia finau ma le lototele, onosa’i ma fa’amoemoe i le Atua.

GALUEGA FA’ATINO; Saunia ni nai fesili faigofie e faamanatu ai i tamaiti le tala sa faamatalaina. Ia faamalamalamaina i tamaiti upu o lo’o taua i le mataupu, ina ia latou iloa ia upu aemaise o uiga o ia upu mo le lumanai.

A'OA'OGA: 1. A finau ma le onosa'i e taunu'u i le manuia.

2. E suia e le Atua le ola tuai i mea fou.

3. A finau ma le amiotonu, e fiafia tele mai le Atua.

4. 'Aua le teu fatuina leaga o isi, 'ae fa'amagalo iai.

Fa'aopoopo ane e lau Susuga nisi a'oa'oga, pe fesili fo'i i fanau po'o a ni a'oa'oga ua maua mai i le tala.

PESE: Ia e tau malosi tete'e i le fili,

'Aua lava ne'i e fa'avaivai,

A 'ia e tau mo le Ali'i o 'au,

E aoga e tutumau.

Fa'ai'u ane e lau Susuga i se tatalo, e fa'auma ai le fa'asoa o lenei Aso Sa.

//

ASO SA – FEPUARI 11, 2024

MATAUPU: “E LEAGA LE OLA PEPELO”

TUSI FAITAU: 2 TUPU 5 : 20-27

SINI: Fa'amatala pea i fanau le leaga o le ola pepelo, aua e fanau mai ai le gaoui ma isi a uiga e le mulimuli ai le tagata i Tulafono a le Atua.

FFESOASOANI MO LE FAIAOGA: Fa'atalofa atu i lau Susuga a le faiaoga, malo le onosa'i e usu aua le galuega fa'a faiaoga o lenei Aso Sa. Fa'asoa pea i fanau le uiga loloto o le mataupu, ma 'ia maua se avanoa e malamalama ai i le uiga o le upu pepelo. Ia maua fo'i se avanoa e faitau ai le tala ma ia manino fanau i le feso'ota'iga o le mataupu ma le tala. Fa'ai'u fo'i lea i nai fesili e fa'atatau lava i le tala o lo'o aumaia ai le mataupu.

FESOASOANI MO LE MATAUPU: E leaga le ola Pepelo; O le tatou mataupu lea o lenei Aso Sa, taoto Na'amanu (o le ali'i e pule i 'au a Suria) le na fa'atonu e Elisaia e alu e tofu fa'afitu i le vaitafe o Ioritana e mama ai lona ma'i lepela. 'Ae se'i tulituliloa le auauna a Elisaia o Kiasi sa le fiafia ina 'ua toe fo'i le pule i 'au a Suria 'ae le tu'ua e Elisaia se mea a e tasi a Na'amanu na sau ma ia. Na ia manatu o le a ia tuliloa ia Na'amanu, ina ia maua mai se mea mo ia. O nei gaoioiga uma na fai e Kiasi 'ae le iloa e lona matai, na ia alu ma mulimuli pea ia Na'amanu. Na iloa mai e Na'amanu, ona sau lea o ia i le nofoa fa'ata'avalevale, ma ia

fesiligia Kiasi; Pe se a le fe'au e te sau ai? Na fatu e Kiasi le pepelo ma ia fai atu na tuli mai o ia e lona matai e fai atu; Fai mai na omai ia te ia o taulele'a e to'alua mai le mauga o Efaraima, o so'o o le 'au perofeta, se'i avane mo i la'ua le taleni ario e tasi ma ofu e lua. Na ave iai e Na'amanu taleni ario e lua ma tu'u i totonu o taga e lua, ma ofu e lua ona o lea o auauna e to'alua a Na'amanu e ave. Na mulimuli atu Kiasi ma 'ua o'o i le mauga ona ave lea e Kiasi o mea sa auauna a Na'amanu ma tu'u i le fale, 'ae toe fa'afo'i ia te i la'ua. Ua ulufale Kiasi ma tu i luma o lona matai, Na fesili Elisaia po'o fea na iai? Ua fatu fo'i le isi pepelo, e le'i alu lava i se mea. Na fa'ate'ia ina 'ua fai atu Elisaia, i mea uma na ia faia i le ta'ita'i o 'au a Suria. O le mea lea na fai atu ai loa Elisaia ia Kiasi; O le a pipi'i atu ai ia te oe ma au fanau le lepela o Na'amanu i au tupulaga. Ona alu ese ai lea o ia ai luma o Elisaia, ua lepela e pei o le kiona. E le lelei le ola pepelo, aua e o'o mai ai mafatiaga e le mafaufauina.

A'OA'OGA: 1. 'Aua ne'i galo o lo'o sisila mai fofoga o le Atua i mea uma tatou te faia.

2. O le ola pepelo, e i'u i puapuaga.

3. E le lelei le pepelo, 'ae ta'u ai fua isi tagata.

4. O le fiafia e pepelo e fanau mai ai le gaoi.

5. E le fiafia le Atua i le tama/teine e ola pepelo.

PESE: Ma te o ma Iesu i aso uma nei

Na te ta'ita'i i le ala laulelei

So'o se mea e faia ou te mulimuli ai

Ou te finau lava ou te le vaivai

CH. Mulimuli, mulimuli ia Iesu

I iinei, iina, ou te alu ai

Mulimuli, mulimuli ia Iesu

So'o se mea e faia e te fa'atasi mai.

TATALO: Fa'afetai le Atua i lou a'oa'o mai, ina ia matou lagona le taua o au afioga uma lava. Fa'amanuia fanau ma fa'amalamalama mai i o matou le taua o le mafuta atu ia te oe, e mamao ai o matou loto ma le ola pepelo. Fa'amagalalo i matou um ai le fa'aolataga na saunia e Keriso Iesu, ua ala atu le tatalo. Amene!

Manuia le aga atu i sauniga faitele o lenei Aso Sa

//

ASO SA – FEPARI 18, 2024

MATAUPU: “ O LE TAGATA FAUFAU LEAGA MA LAUGUTU FA’A’OLE’OLE E I’U I LE MALAIA”.

TUSI FAITAU: FA’ATAOTO 18:4-8; 26:23-28

SINI: Ia manino fanau, o le faufau leaga ma laugutu fa’aleole e le i’u i se lelei. Ia manatua o mea e te taumafai e leaga ai nisi tagata, e toe i’u atu lava ia te oe.

FESOASOANI MO LE FAIAOGA: Manatu ua maua se fa’asiliga o le malosi e lau Susuga i lenei taeao. Amatalia ai fo’i le fa’asoa mo nai fanau, amata ane i se tatalo pu’upu’u ona toe fa’amanatu lea i ni fesili mo le mataupu o le Aso Sa ua mavae. E lelei pea le fa’amanatu mo i latou ina ia iloa ai o lo’o manatua pea le tala. E taua le faitau o le Tusi faitau ma malamalama fanau i upu o lo’o faitauina. Manuia le fa’asoa!

FESOASOANI MO LE MATAUPU: Manatua fo’i o le Tusi o Fa’ataoto o le tu’ufa’atasiga o a’oa’oga o mataupu i mea lelei e tatau ona ola ai le tagata. O nei a’oa’oga o ta’iala i le tagata poto pe afai e feagai ma fa’afitauli eseese atoa ma lona si’osi’omaga. O nisi o mea ua fa’atauaina i lenei tusi o tima’iga i le tausiga o le va fealoaloa’i ma isi tagata, o le amio lelei ma le loto pulea. Peita’i o le mataupu o lenei Aso Sa; **O le tagata faufau leaga ma laugutu fa’aleole e i’u i le malaia.** Aumaia e le Poto le ata o upu e tautala ai le tagata ma le mea e fa’atusa iai. E fa’atusa i vai loloto, ma e le lelei ona mulimuli pe ‘au ma le tagata agasala, aua e pa’u’u fa’atasi ai i le malaia. E alaga le vale ia tutupu vevesi ma taua ma tupu pea le femisaa’i. O a’oa’oga ma le fa’amanatu leotele a le Poto ina ia manino le tagata o ana lava upu e fano ai lava ia ma o le mailei lava lea ua ia fafauina. O upu fo’i e faufau e le tagata e afaina ai se tasi, e fa’atusa e le Poto i meaa’i suamalie ua o’o i le manava. O ana a’oa’oga ina ia ‘alo ese mai le mea e sau mai le gutu e foliga o aumai i se agaga alofa ae leaga le loto. O le fa’afoliga ma pei e feso’ota’i tala ma le loto ae faufau mai i le pepelo, ua tautala i upu suamalie ‘ae ufiufi e ia lona inoino i le pepelo. Fa’amanatu mai le tagata na te elia se pu ma le fa’amoemoe e pau ai se tasi i totonu, e toe pau ai lava ia. O le faia o le mailei e toe lavelavea ai lava ia, fai mai le Poto o le laulau faiva pepelo, ua inoino ia i e ua momomo ai, ma le ua gutu molemole e i’u i le malaia. E le lelei le faufau i mea e leaga ai ma tautala i upu fa’aleole, aua fai mai a’oa’oga a le Poto e malaia ai le tagata e fiafia e fai.

A'O'AOGA: 1. Ia 'alo'alo ese ma le faufau o mea leaga aua e i'u i le malaia.

2. O mea uma e fai e le tagata, ia faia lava ma le agaga lelei.

3. Ia mafaufau i le poto o le Atua e ta'iala ai le ola ma mea e fai.

4. Ia mamao manatu ma le faufauina o mea e afaina ai isi tagata ma gaepu ai le va nonofo o uso

5. O mea leaga e taumafai le tagata e fafau, e toe afaina ai lava le o ia.

PESE: Pese ma Viiga

Ou te tagi i lou tama e, (Pese 134)

TATALO: Fa'afetai le Atua i lou agaga mafuta mai e tauto'alua so matou vaivai, i le feagai ai ma le fa'asoa o lenei taeao. Fa'amalamalama mai i fanau ma o matou tagata tala o le ola tau i lau Afio. Fa'atasi mai pea i le aga atu mo tapua'iga fai tele o lenei Aso Sa. Fa'amagalo o matou sese uma, ma tausia i matou e lou alofa lavea'i. E ala ia Iesu le tatalo. Amene!

Manuia le fa'agasologa o Sauniga o lenei Aso Paia!

////////////////////////////////////

ASO SA – FEPUARI 25, 2024

MATAUPU; “FA’AMANATU O LE MASINA FEPUARI”

MATAUPU MUAMUA: E MANUIA LE TAGATA OLA FINAU

Tali mai Fesili Nei!

1. O ai le igoa o le alia na ave iai e Iakopo ona to'alua ma lana fanau ma ana mea uma?

Tali: O le alia o Tapota.

2. O ai le igoa na sui ai le igoa o Iakopo?

Tali: O Israelu.

3. O le a le uiga o le igoa o Israelu lea na sui ai le igoa o Iakopo?

Tali: O le Ali'i o ia o le Atua.

ASO SA – MATI 03, 2024

MATAUPU: “O LE VALA’AUINA O ULUA’I SO’O O IESU”

TUSI FAITAU: LUKA 5:1-11

SINI: Ia iloa e fanau o le valaa’uina o ulua’i so’o o Iesu, o le valaa’uina fa’atasi fo’i lea ma i tatou e avea ma so’o ma ola i le ola o le Keriso toetu.

FESOASOANI MO LE FAIAOGA: Manaia lava le fa’agasolo o le mataupu o lenei Aso Sa, i le amata i se tatalo e saunia e lau Susuga po’o le tofi fo’i o se tama/teine e fa’ata’ita’i ona tatalo. A ma’ea ona toe fa’amanatu lea o fesili o le mataupu fa’amanatu o Fepuari ina ia maua pea le manatua e fanau o tala ua ma’ea ona talanoaina. E lelei pea ona fa’amasani i le faitau o le Tusi Paia tu’uina atu mo le tatou fa’asoa o lenei Aso Sa. Manuia le Tapenaga.

FESOASOANI MO LE MATAUPU: O le vala’auina o ulua’i so’o o Iesu. So’o se galuega lava e tau amata, e mana’omia e ta’ita’i nisi e fesoasoani i le amataina. ‘Ae o le filiina fo’i o se ‘au va’a, e fili i le malosi ma le atamai e fa’atino ai se galuega. Peita’i ua lalagaina e le tusitala o Luka le tala i le filiina o ulua’i so’o o Iesu. O le ata e iloa ai le ese o faiga a le Atua, fai mai Luka, ua tu Iesu i le auvai o Kenesareta. Ua le mafai le lolofi ane o tagata e to’atele e fia fa’alogologo ia Iesu ma ana a’oa’oga. Ona iloa ai lea o va’a ua toso a’e i le auvai a ‘ua leai le auva’a, ona alu lea o Iesu ua oso i totonu o le tasi va’a, a’o le va’a lea o Simona. Na ia augani ane e fa’aitiiti atu le va’a i tai, ona a’oa’o atu lea o ia i le motu o tagata ma ‘ua ma’ea ana upu. Ona fetalai ane lea o ia ia Simona, tu’u atu le va’a i le loloto, ma tu’u ifo ai a outou upega. ‘Ae fai mai le tala a Simona, Iesu ua alu le po e leai se i’a, ‘ae ona o lau fetalaiga ou te tu’u ifo ai le upega. Fai mai le tala a Luka, na uma ona latou faia e pei ona fetalai ane ai Iesu, na matua ofo i latou ina ua si’omia le ‘au i’a tele, ma ua masae upega ma tali gogoto ai o latou va’a i le tele o i’a. Simona Peteru o le polofesa o fai faiva i le vai lea, a’o lea ua fa’apaū faō ma ifo ia Iesu. Le fa’ailoga o le tagata ua lagona lona le tutusa ma le Ali’i. E iloa ina ua ia fai atu; o a’u o le tagata agasala. Ua matuā ofo lava Simona ma Iakopo ma Ioane le fanau a Sepetaio, i lea vaa’iga uiga ese. Fetalai atu lea o Iesu ia Simona; ‘aue e te fefe, e amata i nei ona po ona e maua tagata. Ua tuta o latou va’a, ma tu’ua mea uma ‘ae mulimuli ia Iesu. Ulua’i so’o o Iesu na fili mai i le vai o Kalilaia, o fai faiva iloga o lea vai, peita’i ua fetalai manino le Ali’i; Ou te faia outou ma faifaiva i tagata, ua le o le i’a, a’o le agaga mo le Ali’i.

A’OA’OGA: 1. O a mea o e fiafia iai ia tu’u ‘ae fai nisi mea fou e viia ai le Atua.

2. ‘Aua le augata e tali le vala’au a le matai pe a fai i taua ma so’o.

nu'u ma le fa'amanatu pea ia Isaraelu le mafua'aga na mafua ai ona o'o i le tafeaga, ua mamao o latou loto ma lo latou Atua. E le mafai ona alu ese ai le a'ao ta'ita'i o le Atua, lea e fa'amanatu iai le anapogi e tatau ona latou faia e pei ona aumaia i fuaiupu e 6,7,8. O le ata o le alofa o le Atua i ona lava tagata, peitai, e atagia lava i tagata le femoumoua'i o o latou manaoga fa'a le tagata. O lea fo'i o lo'o atagia tele i le ola, o le galo o le Atua ina ua 'ae'ae i manuia ma ola fiafia ona le manatua lea o le na foa'i mai le sosia ma le tamaoaiga ina ia ola manuia le tagata ma maua le ola fefa'asoa'i. Ona malie ai lea o upu fa'ai'u o le fuaiupu e 8; **"e alu atu fo'i la'u amiotonu i ou luma, e mulia'u mai le pupula o le Ali'i ia te oe,"**

A'OA'OGA: 1. Ia fiafia e ola i le fa'ataunu'uina o le tatalo ma anapogi.

2. O le ola usita'i ma fa'alogo i le Atua, e manuia ai la'asaga uma o le ola.

3. E ola fa'a foliga loa le tagata, e fetaia'i lava ma faigata ma tiga.

4. Ia fai ma mea fiafia le tala'i o le finagalo o le Atua, ae 'aia le tau solomua i le ola le fa'amaoni.

Lelei fo'i le fesili pea i tamaiti, po'o le a ni a'oa'oga ua latou maua mai i le mataupu sa fa'asoa ma fetufaa'i ai.

PESE: E lelei, e lelei, e lelei tele le Atua,

E lelei, e lelei, e lelei tele le Atua,

E lelei tele le Atua, e alofa ia i taua,

Fa'apei o Isaraelu a'o le i le vaomatua.

TATALO: Fa'afetai le Atua, i lou fesoasoani mai i le fa'asoa o lenei taeao. Lagona lo matou vaivai, 'ae maua le malosi e fa'aauau ai le galuega aua ua mautinoa lou auai mai ia i matou. Fa'afaigofie la matou fa'alogo ina ia manino i uiga loloto o au afioga. Fa'amagalo fanau ma o matou tagata i mea ua fa'aletonu ai i matou i ou luma. E ala atu ia Iesu le tatalo. Amene!

MANUIA LE ALO ATU I SAUNIGA FAITELE O LENEI ASO SA

////////////////////////////////////

ASO SA – MATI 17, 2024

MATAUPU: "E TAUGATA LE ALOFA MONI"

TUSI FAITAU; IOANE 12:1-11

SINI: Fa'amanatu pea i fanau le taugata o le alofa moni, aua na faia lava e Iesu le ata o le ALOFA na fo'ai ai lona ola e fa'aola ai le tagata ua tumu i le sese ma agasala.

TAULOTO: “Ona tago ai lea o Maria i le pauna o le u'u nato tau tele; ua ia u'u ai vae o Iesu, ma soloi ona vae i lona lauulu; ua tumu foi le fale i le manogi o le u'u.”

FESOASOANI MO LE FAIAOGA: Malo le onosa'i i lenei taeao, manatu lava ua maua se fa'asiliga malosi aua le feagai ai ma tiute fa'a faiaoga Aso Sa. Fa'asoa pea i le taua o le ola alofa atu, ma ia iloa e fanau le taugata o le u'u na fa'atino ai le alofa o le fafine mo lona matai. 'Ae na faia atoa e Iesu le fa'ata'ita'i o le alofa taugata. Manuia le fa'asoa mo le mataupu o lenei Aso Sa. E lelei a le faitau pea o le Tusi Paia e aoga mo fanau ma ia malamalama i upu o lo'o i le faitauga.

FESOASOANI MO LE MATAUPU: Manaia le mataupu o lenei Aso Sa, **E taugata le alofa moni;** ua iloa le ulua'i alofa ma 'ua le pogisa ai le iloa o le Atua na mua'i alofa mai e ala i le auina ifo o lona Alo pele e maliu ma tanumia i le tu'ugamau a'o lona alofa na toe fa'atuina mai ai o ia e fai ma tala malie i le ola o le tagata agasala. Aumai e le faitauga o lenei Aso Sa le ata o le Ali'i alofa, fa'atoa uma a ona fa'atuina Lasalo na oti, le vavega na faia e Iesu ina 'ua tauanau atu Maria ma Mareta (tuafafine o Lasalo) i le Ali'i ina ia toe fa'aola lo la tuagane, mai le oti. Peita'i, o le tala ua fa'amatala i lenei taeao, o le maliu atu o Iesu i Petania a 'ua toe ono aso ona fai ai lea o le paseka a'o la e iai ma Lasalo lea na toe fa'atuina mai le oti. Fai mai o lo'o iai fo'i ma lona tuafafine o Maria. Ua taoto e aai fa'atasi ma le Ali'i, ona tago lea o Maria i le pauna o le u'u nato tautele; ua u'u ai vae o Iesu, ma soloi i lona lauulu; ua sasala lava le manogi o le u'u i totonu o le fale atoa. Fai mai o le u'u manogi lea e matua taugata lava, o le mea lea na fai ane Iuta, le so'o na fa'alataina Iesu; Pe aisea ua maimau ai le u'u? Sa sili ona fa'atau ma maua ai se tupe mo e matitiva. Ua silafia e le Ali'i mea uma, aua e tautala mai Iuta a'o le tagata gaoi i tupe. Na fa'ate'ia ina 'ua fetalai Iesu; Tu'u ai pea ia te ia, Ua teu e ia lenei mea mo le aso o le fa'ata'imuaga o lo'u tanuga. Tu'u sa'o a tala a le Ali'i; Tou te mafuta pea ma e matitiva, a'o a'u, tatou te le nonofo pea. O le ata o le alofa na le fa'atauina ai le u'u, ina ia maua se tupe, a'o lea ua fai ma ata o le fa'atau ai o le alofa i lenei lava u'u taugata. O le ata na fa'aataata ai le atoa o le alofa na faia e Iesu ina ua ia ofoina lona soifua e fai ma fa'aolataga o le tagata. E taugata le alofa moni, e le taugofie, e manatu mama ai le to'atele ae le'i mama ia Iesu le alofa ina ia maua le ola fialia o lana fanau.

A'OA'OGA: 1. Ia alofa atu ia pei o oe lava ia te oe, o a'oa'oga na a Iesu.

2. Ia tutusa uma tagata i lau vaai, ‘aua na’o tagata e maua ai mea.
3. O le a se meat aua oi ia te oe, ia foa’i mo le ua mana’omia.
4. ‘Aua le vaoia le tagata ua fai se mea sili mo isi.
5. Manatua le alofa o Iesu e ala i lona maliu ina ia manuia le tagata.

PESE: Alofa i ou tuaoi a’o e malaga,

Seia i’u lenei folauga,

Fa’atuatua ma fa’amoemoe i le Atua,

E taugata lona alofa mo i taua

TATALO: E lelei fo’i ona tofi ane se tamaititi e saunia se tatalo e fa’auma ai le mataupu o lenei Aso Sa. Manuia tele sauniga o lenei Aso Sa Paia.

////////////////////////////////////

ASO SA – MATI 24, 2024 (ASO SA LAUPAMA)

MATAUPU: “UA LATOU FOLA LAU O PAMA I LE ALA”

TUSI FAITAU: IOANE 12:12-19

SINI: O le ‘auga lava ia malamalama tamaiti i le uiga o le mataupu fa’atatau mo lenei Aso Sa. O le malaga fa’atupu a le Ali’i a ‘ua fola ai e tagata lau o pama i le ala lea e malaga atu ai Iesu. O nisi na fa’aaoga o latou ofu e fola ai le ala, ‘aua fo’i ne’i galo ia fa’a manino i tamaiti foliga o le laupama, e ma’amaa’i o le ata o puapuaga o le a fetaia’i ma le Ali’i.

TAULOTO: “Tou te leiloa ea, ua le aoga sa outou mea e fai? Fa’auta ua mulimuli atu le lalolagi o tagata ia te ia.”

FESOASOANI MO LE FAIAOGA: O le Faiga masani lava amata i se tatalo e saunia e lau susuga po’o le tofi fo’i o se tama/teine e tatalo e fa’amasani ai latou i le fiafia e ola tatalo. Lelei pea le faitau o le Tusi Paia ina ia fa’amasani tamaiti i le faitau ma malamalama i uiga o upu o lo’o faitauina. Manuia le fa’asoa i fanau i lenei Aso Sa. Manuia fo’i le Aso Sa o le Laupama.

FESOASOANI MO LE MATAUPU: O le malaga fa’atupu a Iesu i Ierusalem, ua fa’alogo ai le motu o tagata na o ane i le tausamiga. Ona latou fola lea o le ala i lau o pama, ma

alalaga; Osana! Ia manuia le afio mai i le suafo o le Ali'i, ua alalaga fo'i; O le tupu o Isaraelu. O le'auga lea ua o mai ai tagata e fa'atali le malaga fa'atupu a le Ali'i. Aua ua latou iloa Iesu a'o fa'atasi ma ia i le toe fa'atuina mai o Lasalo mai le oti. O le agaga e fia tulituliloa le tupu ua afio mai, o le faigofie lena ona o ane tagata ma fola lau o pama i le ala ona o le fia matamata pea i vavega na faia e Iesu. Manatua fo'i na'o le motu o tagata na o latou iloa lelei le Iesu lea, peita'i o le 'au faresaio e le taitai ona malamalama ia te ia. Lea e molimau Ioane na i'u a i le fetautalatalaa'i le 'au faresaio ina 'ua latou iloa 'ua le aoga a latou mea o lo'o fai aua ua mulimuli uma atu le motu o tagata ia te ia. Le malaga fa'atupu a Iesu i Ierusalem na manatu le to'atele o se malaga lava e le o atagia ai le taunu'u i le oti. Peita'i, o le malaga lava e to'a i tiga, o le malaga o lo'o taoto ai le manuia mo le ola e fa'avavau. Silasila fo'i i foliga o le laupama, e ma'amaa'i o le ata o le tui ma tiga, lea o le feagai ma le Ali'i o Iesu. O le malaga na ti'eti'e ai Iesu i le tama'i asini, o le manu filemu a'o le uiga loloto lena o le malaga fa'atupu ina ia iloa e le lalolagi o ia lava o le Ali'i o le Filemu. O lea fo'i le ata o le talia o le tagata malaga e tapena ma sauni ina ia maua le agaga o le talimalo lelei. A'o le talimalo e aumai ai le le fa'aailoga tagata e tapena ma naunau ina ia talia tagata uma ma le agaga fiafia. O le fola foi o le ala i lau o pama o le ata o le talia o le Ali'i ma le loto fiafia. O lea fo'i le feau lelei o le mataupu mo fanau i lenei Aso Sa o le Laupama, ia fiafia e fai mea sili ina 'ia ta'ulelei ai aiga, nu'u, malo le atunu'u aemaise le galuega pele a le Atua.

A'OA'OGA: 1. Ia faia pea mea sili mo le Ali'i.

2. 'Aua le vaai maualalo i nisi tagata 'ae ia tutusa uma.

3. Ia faia pea galuega lelei mo le viiga o le Atua.

4. 'Aua le mulimuli i taiga a tagata tau fa'a sese.

PESE: Tamaiti vave mai ia Keriso, Ia Keriso, Ia Keriso,

Tamaiti vave mai ia Keriso aua e ola ai i tatou.

CH: Pese Aleluia, Pese Aleluia

TATALO: Saunia e lau susuga se tatalo e fa'amae'a ai le lesona.

MANUIA SAUNIGA O LENEI ASO SA O LE LAUPAMA

////////////////////////////////////

ASO SA – MATI 31, 2024 (ASO SA O LE ESETA)

MATAUPU: “UA TOETU LE ALI’I”

TUSI FAITAU: MAREKO 16:1-18

SINI: O le Aso sa o le Toetu, o le aso e fa’amanatuina pea e le ‘au kerisiano aua o le o’o mai o le Talalelei i le lalolagi. Ua manumalo Iesu mai le tu’ugamau ma le oti. Ia iloa e fanau o le toetu mai o Iesu, o lona alofa lava lea i le lalolagi agasala.

TAULOTO: A ua fai atu o ia ia te’i latou, “Aua tou te matata’u; o lo’o outou saili ia Iesu le Nasareta o le na fa’asatauroina; ua tu o ia; e le o iinei; ina matamata ia i le mea na tu’u ai o ia.”

FESOASOANI MO LE FAIAOGA: Manatu i le fa’atutugata o lenei taeao, ‘ae malo le onosa’i ma le lava papale e ala usu ai i le falesa i lenei taeao o le Eseta. O lo’o i lau susuga lava le faitalia e fa’agasolo ai le mataupu o lenei Aso Sa. Manaia fo’i ‘ae amata i se tatalo saunia e lau susuga po’o le tofi fo’i o se tama po’o se teine e saunia se tatalo e amata ai le fa’asoa. Ia fa’amasani pea fanau e faitau le Tusi Paia ma malamalama i uiga o upu ma le autu aoao o le Aso Sa lenei.

FESOASOANI MO LE MATAUPU: Ua mavae atu lena Aso Sa sa tatou talanoa ai i le malaga fa’atupu a Iesu i Ieruselema. Ua mavae atu foi le aso maliu o le Ali’i ina ‘ua latou fa’asatauro ma fasioti ia te ia. Peita’i o lenei taeao o le Aso Sa o le Toetu po’o le Eseta, le taeao ua toetu ai le Ali’i mai le tu’ugamau. Tasi lenei o tala o lo’o fa’amaumuina e le ‘au fai evagelia, Mataio, Mareko, Luka ma Ioane. A’o le tala o le toetu ua fa’amaumuina e le tusitala o Mareko, faimai, ua mavae le sapatu ona o lea o Maria le Makatala, ma Maria le tina o Iakopo fa’atasi ma Salome ua fa’atau mea manogi, latou te ‘ave e u’u ai le Ali’i. Na o i le taeao lava o le aso muamua o le vaisapati, na savavali ma talatalanoa pe fa’apefea ona latou fuliese le ma’a tele i le gutu o le tu’ugamau. Na fa’ateia i latou ina ‘ua latalata atu i le tu’ugamau ma latou iloa ai ua leai se ma’a na pupuni ai le tu’ugamau. Ma ‘ua latou ulu atu i totonu ma iloa atu le taulealea o lo’o saofa’i i le itu taumatau ma ona ofu papa’e tatapuvae. Fai mai ua fefefe i latou ona o lea vaaiga ua latou iloa, ‘ae fa’ateia i latou i le fa’apea o le tagata lea; “**‘Aua tou te matata’u; o lo’o outou saili ia Iesu le Nasareta o le na fa’asatauroina; ua tu o ia; e le o iinei; ina matamata ia i le mea na latou tu’uina nai o ia.**” O le tala na matua fa’ate’ia ai latou ma ‘ua ia fai ane; O atu ma fa’a’ailoa i ona so’o atoa ma Peteru, ma e muamua atu o ia ia te outou i Kalilaia, ma o iina tou te iloa ai o ia e pei ona fai atu ia te outou. Na fa’atumulia i latou i le fefefe ma ‘ua latou tu’ua lea mea ‘ae sosola ese i fafo latou te le’i ta’uina atu fo’i i se tasi ona o latou matata’u tele. O lea tala na le’i talia ma talitonu ai i latou na fa’alogo iai,

fanau. Amata lava i se tatalo saunia e lau susuga pe manaia fo'i le fai fa'atasi o le tatalo na a'oa'o mai e le Ali'i. Manuia le fa'asoa i fanau.

FESOASOANI MO LE MATAUPU: O le faitauga o lenei Aso Sa, o le taumafai pea o le Ali'i e a'oa'o atu i lona 'au so'o le uiga loloto o le ola fa'asoa atu mo isi, 'aua le tau lava o i latou. Aumaia ai e le tusitala o Mareko le ata; "ua fafagaina e Iesu le to'atele o tagata" Fai mai ua omai le 'au aposetolo ia Iesu ma fa'ailoa mea uma na latou faia ma latou a'oa'oga na latou a'oa'oina ai le motu o tagata. Ona fetalai atu lea o Iesu; "Ina omai ia, tau lava o i tatou, i se mea tu'ufua, se'i tou mapu 'ae teisi" Aua ua to'atele e na feoa'i ai ua le mafai ai ona latou aai. Fai mai 'ua o Iesu ma le 'au aposetolo i le va'a, a 'ua le mafai ai le mulimuli atu o tagata ma 'ua ui atu i le pa'u matu (ui a uta) o isi 'ua muamua atu nai a te'i latou. O le silasila alofa a Iesu i le motu o tagata mulimuli pea, ma fia iloa tino le uiga o ana a'oa'oga, peita'i o le manaoga o le Ali'i e le o le manatu lena o le 'au aposetolo. E iloa i lo latou fai atu ia Iesu, po'o fea a maua ai ni meaai e fafaga ai le motu o tagata 'ua to'atele naua, ina tu'uina atu i latou e o e saili ni a latou meaai. A 'ua fetalai atu Iesu; Ina avatu ia e outou ni meaai ma latou. Na fesili le Ali'i; Pe fia ni a outou areto? Ua latou iloa ma 'ua tali atu ia te ia; E lima ma i'a e lua. Ona fai ai lea e Iesu le vavega, ma ia fetalai atu lea o ia ia te'i latou; Fai atu i le motu o tagata e taoto i vasega ta'i lima sefulu ma ta'i selau. Ona tago lea o Iesu i areto ma i'a ona tepa a'e lea i le lagi ma fa'afetai, ona tofitofi lea i areto ma i'a e lua, ua tu'u atu i lona 'auso'o e tufatufa atu i le motu o tagata e aai ai. Fai mai le tala, na maona le aofa'i o tagata pe lima afe tane 'ae le'i faitaulia fafine. Na latou fu'e fo'i toega meaai ma maua ai ato e sefulu lua. O le vavega na faia e Iesu, ina 'ia manino le 'au so'o ma le motu o tagata, e leai se mea e le mafaia e le Ali'i ona fai. UA talitonu fo'i le 'au so'o i le fetalaiga a Iesu; Ia outou fafaga ia i latou. O le iloa e le 'au so'o le Iesu e le mativa i se mea, ua manatu latou i le laiti o meaa'i, peita'i e fa'atupu e le Ali'i le tele pe a talitonu ma fa'atuatua pe i le Atua.

A'OA'OGA: 1. 'Aua ne'i galo e le oge mea le Atua.

2. Fa'alogo ma usita'i i le Ali'i, aua e tupu ai le tele o fa'amanuiaga.

3. Ia ola i le ola fa'asoa atu, 'ae 'aua le lima mau.

4. Alofa atu mo le 'ua mana'omia se fesoasoani.

5. 'Aua le fialia e aisi, 'ae augata e ola foa'i mo isi.

PESE: Alofa i ou tuaoi a'o e malaga, se 'ia i'u lenei folauga.

o Aperamo, o le Atua o Isaako, o le Atua fo'i o Iakopo, ona pupuni lea e Mose ona mata aua ua tumu ia i le fefe. Ua silafia e le Atua le oi ma le mapuitiga o lona nu'u i Aikupito, ona ia valaa'uina lea o Mose e alu e aumai lona nu'u mai lima o Farao. Ua le mautonu Mose, e iloa i lona fa'apea atu il er Atua; "O ai ea a'u nei ou te alu atu ai ia Farao ma a'u aumaia le fanauga a Isaraelu mai Aikupito? Tali le Atua ia Mose, Ou te ia te oe lava; ua le mautonu lava Mose, aua na ia toe fesili atu i le Atua; Pe afai ou te alu atu i le fanauga a Isaraelu, ou te fa'ailoa atu iai, ua auina mai a'u e le Atua o o outou tama, ma e le mafai lava ona le fesili mai; Po'o ai ea lona suafa? O le a sa'u tali atu ia te'i latou? Ta'u iai; O A'U LE OLA, O LO'O OLA LAVA. Ma ia fai atu pea i le fanauga a Isaraelu; Ua auina mai 'au e le Ali'i, le Atua o o outou tama, o le Atua o Aperamo, le Atua o Isaako, ma Iakopo o lo'u igoa fo'i lena e fa'avavau ma la'u fa'amanatuga i lea tupulaga ma lea tupulaga. Alu ia ma fa'apotopoto toeaia ma le nu'u aua 'ua lagona atu lo latou oi i Aikupito.

E ui lava sa le mautonu Mose i le fa'atonuga a le Atua, 'ae sa tulai lava ma alu aua ua uma ona fa'ailoa iai e le Atua le alafua o le alu e lavea'i ma aumai lona nu'u mai Aikupito. Ioe, manaia ia o le fa'alogaga ma usita'i e tali le valaa'u a le Atua. Afai e valaa'u le Atua, i le tagata e mautinoa lava e auai a le Atua i ala uma o le uia ma o ia fo'i e faigofie ai mea uma o le a feagai ma le tagata valaa'uina.

A'OA'OGA:1. A valaa'u loa le Atua, tula'i loa ma alu e auai lava le Atua i mea uma.

2. Afai e le'o mautinoa le mea e agai iai, alu pea ma le fa'atuatua i le Atua.

3. Talia pea tiga o le galuega aua e mautinoa le fa'amama avega o le Atua.

4. O faigata o le ola valaa'uina, e i'u i le fiafia ma le manuia.

5. O le ola usita'i ma fa'alogaga i matua, e i'u i le fa'aeaina.

PESE: Filifili ane se pese e fetau ma le mataupu, e pepese fa'atasi ai ona fa'ai'u lea i le tatalo na a'oa'o mai e le Ali'i o Iesu e fa'auma ai le mataupu o lenei Aso Sa.

Manuia Sauniga o le Aso Paia!



ASO SA – APERILA 21, 2024

MATAUPU: “FA’ALOGO MA TALIA FAUTUAGA A E MATUTUA”

TUSI FAITAU: 2 NOFOAIGA TUPU 10:1-19

SINI: Ia iloa e fanau o le ola usita'i, fa'alogo ma talia fautuaga ma timaiga a matua, le 'au matutua le 'aufaigaluega ma faiaoga e i'u i le manuia.

TAULOTO: Na fa'amamafaina e lou tama la matou amo; o lenei, ia e fa'amama le galuega tiga a lou tama, ma lana amo mamafa na ia fa'ae'etia ia te i matou, ona matou auauna ai lea ia te oe. (2Nofoaiga Tupu 10:4)

FESOASOANI MO LE FAIAOGA: Malo le onosa'i, i le ala usu i lenei fo'i taeao mo le fa'ataunuaina o le Aoga Aso Sa. E maua a le malosi fa'asili mai le Atua e fa'aauaina ai le fa'asoa o le mataupu i fanau. E le vale a le tau'i mo e fiafia e fa'amatala tala o le Atua mo fanau ina 'ia lagona e i latou le taua o le malamalama i tala o le Atua. Amata i se tatalo, ona faitau ai lea o le Tusi Paia e faigofie ai ona manino i le mataupu. Manuia le fa'asoa i fanau.

FESOASOANI MO LE MATAUPU: "Fa'alogo ma talia fautuaga a le 'au matutua" O le a se lagona pe a fautua atu tagata matutua po'o matua fo'i 'ae le taliaina. O le mataupu o lenei taeao, o lo'o aumaia ai le tala fa'amauiina e le Nofoaiga Tupu e lua, a'o lona mataupu 10 fuaiupu muamua e o'o i le sefulu ma le iva. Ua mavae le oti o Solomona o lo'o fa'amatala i le fa'ai'uga o le mataupu e iva, ona tula'i mai lea o Reopoamo lona atali'i e fai ma tupu o Isaraelu. Ua fa'alogo Ierepoamo ua fai Reopoamo ma tupu e sui tulaga i lona tama o Solomona. Fai mai o le mea lea na sola ese ai ma alu i Aikupito e nofo ai ona o le pulega mamafa a Solomona. O le mea lea na toe fo'i mai ai i Isaraelu ina 'ua maliu Solomona, ma 'ua aami e toeiina o le nu'u ona omai ai lea i luma o le tupu o Reopoamo ma 'ua latou fa'a'ailoa atu le mamafa o le amo na faia e lona tama mo i latou. Ma talosaga atu ia fa'amama le mamafa o galuega tiga ma lana amo mamafa na ia fa'ae'e ia te'i latou. Naunau atu mo se fa'amama, 'ae tali mai Reopoamo e tu'u atu aso e tolu se'i toe mafaufau ai ona toe tu'umuli lea o le nu'u. Fai mai na logo e Reopoamo toeaina na tutu i luma o lona tama o Solomona; Po'o le le mea e fai e tali ai le mana'o o le nu'u ua tu'uina atu ina 'ia fa'amama le mamafa o le amo mo latou. Ona fautua lea iai o toeaina e fai le mea ua talosaga mai ai le nu'u ina 'ia mafai ai ona fai i latou ma au auauna. Peita'i sa le taliaina e Reopoamo le mana'o o toeaina ma 'ua ia fai atu, na fa'amamafaina e lo'u tama le amo mo outou, a'o a'u ou te fa'aopoopoina atu le mamafa i la outou amo. Na a'oa'i atu lo'u tama ia te outou i le sasa, a'o a'u o le a'oaiga mo outou o akarava. Ua iloa e le nu'u uma 'ua le fa'alogo le tupu ia te'i latou, ona toe foi lea o Isaraelu ma fai ane; "So matou tofi ea Tavita?" E le so matou tofi le atali'i o Iese. Isaraelu e, ta'itasi ia ma alu i lou fale 'ie, O lenei, Tavita e, faitalia oe i lou lava aiga. Ona o lea o Isaraelu i o latou fale ie. Ua fai pea Reopoamo ma tupu i tagata o Iuta, ona tuli lea e le tupu o

lana auauna o Aturamo o le na pule i le taulaga, a ‘ua fetogi e Isaraelu i ma’a ma oti ai. Ona sola lea o Reopoamo i Ierusalem. O le i’uga lena o le tagata e le talia fautuaga a tagata matutua. E taua la le usita’i ma talia pea fautuaga e aumai e tagata e matutua atu ia te’i tatou.

A’OA’OGA:1. O le le talia o fautuaga a le ‘au matutua e i’u ai i le fetaia’i ma puapuaga.

2. ‘Aua le manatu i le malosi ona fa’apea lava lea ua pule a oe i au fa’aiuga.

3. E iloa gofie a le tagata e mamao ma le Atua, e le talia fautuaga a isi’

4. Ia fai fa’aiuga uma ma le alofa.

5. Ia mamao le tofa, ma utaga loloto ona ‘augofie lea e talia fautuaga.

Filifili ane se pese e fetaui ma le mataupu, ona fa’ai’u lea i se tatalo e saunia e se tama po’o se teine e fa’auma ai le mataupu.

Manuia le alo atu mo sauniga o lenei Aso Sa

ASO SA – APERILA 28, 2024

MATAUPU FA’AMANATU O MATI MA APERILA

FESOASOANI MO LE FAIAOGA: Malo le onosa’i fa’afetai fa’amalosi mo le tatou aoga o lenei Aso Sa. Ua tatou iai mo le fa’amanatu o Mati ma Aperila, e i lau susuga lava le Faiga o le suega, pe fai ni fesili tusitusi, pe fai fo’i ni fesili e tali gutu. Po’o le a lava le Faiga, ia mautinoa le manatua pea e fanau mataupu sa fa’asoa ai mo masina e lua. Manaia fo’i ‘ae toe fa’amanatu mataupu ta’itasi ona fai ai lea o le suega. O nai fesili e fesoasoani i lau susuga.

MATAUPU O MATI

1. ‘O le valaauina o ulua’i so’o o Iesu”

Fesili: O le va’a o ai na nofo ai Iesu i luga ma a’oa’o atu i le motu o tagata?

Tali: O le va’a o Peteru.

Fesili: O le a le mea na tupu ina ‘ua usitai Peteru i le fa’atonuga a Iesu e tu’u le upega i le loloto?

Tali: Sa maua le tele o i’a, ma ‘ua tutumu ai va’a e lua.

Fesili: O ai fo’i le igoa o le vai lea e tau ai le mataupu?

Tali: O le vai o Kalilaia.

2. “Aua le ola fa’a foliga”

Fesili: O le a se mea o lo’o fa’amamafa mai e le mataupu e 58 o le tusi o Isaia?

Tali: O le a'oaiga o le nu'u i le fa'ataga 'ana'ana i le Atua?

Fesili: O le a le mea lea 'ua tu'ufesilisili ai tagata i le Faiga?

Tali: O le Anapogi.

Fesili: O lo'o atagia mai i le tele o a latou fesili le ata o le a?

Tali: O le le 'ana'ana i le Atua.

3. 'E taugata le alofa moni'

Fesili: O ai le na ulua'i alofa mai?

Tali: O Iesu o le Atua lava lea.

Fesili: O ai le igoa o le fafine na u'u ina vae o Iesu?

Tali: O Maria.

Fesili: O le a fo'i le mea lea na fa'atino ai le alofa o Maria ia Iesu?

Tali: O le fagu u'u nato tau tele.

Fesili: O le a le tala a le 'au so'o i le fafine ma lana u'u?

Tali: Ana ave e fa'atau ua maua ai ni tupe se tele.

4. "Ua latou fola lau o pama i le ala"

Fesili: Aisea na fola ai e tagata le ala i lau o pama?

Tali: Ua fa'alogo o le a afio mai Iesu i Ierusalem.

Fesili: O le a fo'i le manu lea na tietie ai Iesu i lana malaga lea?

Tali: O le asini, a'o le tama'i asini fo'i.

Fesili: Fa'amata na iloa e tagata o le malaga lea a Iesu e taunu'u ai le tusi?

Tali: E leai.

5. "Ua toetu le Ali'i"

Fesili: I le molimau a Mareko, O ai fo'i igoa o fafine e to'atolu ia na o e ave mea manogi fa'au'u ai le Ali'i?

Tali: O Maria le Makatara, O Maria le tina o Iakopo ma Salome.

Fesili: O ai na fulieseina le ma'a na pupuni ai le gutu o le tu'ugamau?

Tali: O le agelu.

Fesili: Ina 'ua taunu'u fafine i le tu'ugamau, o le a le vaa'iga na latou iloa?

Tali: Ua leai se tino o Iesu, 'ae na'o le tagata o lo'o saofai ai i totonu o lo'o ofu i le ofu pa'epa'e tatapuvae.

MATAUPU O APERILA

1. "Ia outou fafaga ia i latou"

Fesili: O ai tagata ia na mana'o Iesu e fafaga?

Tali: O le motu o tagata e to'atele na mulimuli e fia fa'alogo ma va'avaai i a'oa'oga a aiesu.

Fesili: Fai mai fo'i e a le 'au so'o ia Iesu e uiga i le motu o tagata?

Tali: E leai ni tupe e fa'atau ai ni mea'ai e fafaga ai nei tagata e to'atele.

Fesili: O le a le fesili a Iesu i lona 'au so'o ina 'ua uma ona latou fai ia Iesu?

Tali: Pe fia ni a outou areto?

Fesili: O le a fo'i le tali a le 'au so'o?

Tali: E lima ma i'a e lua.

Fesili: O le a fo'i le mea na faia e Iesu i areto e lima ma i'a e lua?

Tali: O le vavega, ma 'ua tufatufa atu i le motu o tagata e aai ma 'u maoona ona fu'e lea o toega na totoe ma maua ai ato e sefulu ma le lua.

2. "Alu ma usita'i e talia le vala'au a le Atua"

Fesili: O ai lea e tau'a i le tala na valaa'u iai le Atua?

Tali: O Mose.

Fesili: O fea na finagalo le Atua ia Mose e alu iai?

Tali: E alu e aumai lona nu'u mai Aikupito o lo'o nofo pologa ai.

Fesili: Na talia gofie e Mose le valaa'u a le Atua e alu?

Tali: E leai, aua ua lagona e Mose lona fa'atauva'a.

Fesili: O le a le fo'i le mea lea na vaai ai Mose?

Tali: O le laau talatala e mumu 'ae le fa'aumatia.

Fesili: O ai fo'i le suafa o le Atua na fai ia Mose e ta'u ia Farao pe a fesili ane?

Tali: O A'U LE OLA O LO'O OLA LAVA.

3. “Fa’alogo ma talia fautuaga a e matutua”

Fesili: O ai le igoa o le atali'i o Solomona na sui tulaga e fai ma tupu o Isaraelu ina 'ua maliu lona lona tama?

Tali: O Reopoamo.

Fesili: O le a le mea na manana'o Ierepoamo ma toeaina o le nu'u e fai e le tupu?

Tali: Ia fa'amama le amo, 'aua ne'i tutusa ma le mamafa o le amo na faia e lona tama.

Fesili: Na talia e Reopoamo le manaoga o toeaina o le nu'u?

Tali: E leai.

Fesili: O le a fo'i le tali a le tupu i le nu'u?

Tali: Na aoa'i atu lo'u tam ai le sasa, a'o a'u o le a'oaiga mo outou o le akarava.

Fesili: O le a le mea na faia e Ierepoamo ma toeaina ina 'ua le talia e le tupu le talosaga?

Tali: Ta'itasi ma alu le Isaraelu i lona faleie, ma 'ua fai mai; E le so matou tofi le aiga o Tavita.

////////////////////////////////////

ASO SA –ME 05, 2024

MATAUPU: “UA FA’APOGISAINA MATA O E LE TALITONU”

TUSI FAITAU: LUKA 24:13-25

SINI: Ia malamalama fanau o le le talitonu i le Atua, e fa’apogisaina ai le vaai fa’a le tino, ma pogisa ai mata fa’a le agaga.

TAULOTO: Ona la fetautalatalaa’i lea; Pe le’i mu ea o ta loto i totonu ia i ta’ua, ina ua fetalai o ia ia i ta’ua i le ala, ina ua fa’amatala mai fo’i ia i ta’ua o tusi. (Luka 24:32)

FESOASOANI MO LE FAIAOGA: Malo le usu seu i le fa’atinoina o tiute fa’a faiaoga Aso Sa i lenei taeao. Manatu lava e le faigofie le usu ‘ae malo le fa’amalosi i le galuega fa’asoa o lenei taeao. Manaia lava le amata i le tatalo ona faitau ai lea o le Tusi Paia e aoga e fa’amasani pea fanau i le faitauina o le Tusi Paia. Fa’amalamalama pea i fanau ni upu e le o manino ai i le faitauga. Manuia le fa’asoa i fanau.

FESOASOANI MO LE MATAUPU: O le fa’atuatua o le talitonu lea i mea e le vaa’ia, a’o le le fa’atuatua o le fa’apogisaina lava lea o mata e pei o le mataupu o lenei Aso Sa. **Ua fa’apogisaina mata o e le talitonu;** Aumai e Luka le tala o le malaga i le aai o Emau. Ua

mavae le toetu mai o Iesu nai e ‘ua oti, ua o ma fetautalatalaa’i ma tu’u fesilisili i mea ua la fa’alogo iai. Fai mai na fa’ate’ia i la’ua ina ua talanoa atu le tagata a’o savavali sa punitia o la mata ma ‘ua leiloa ai e i laua le savavali fa’atasi ma Iesu. Na fetalai atu le Ali’i; Po’o a ia upu o lo’o la fetautalatalaa’i ai ma savavali? Fai mai ua tutu ma mata fa’anoanoa, ona tali atu lea o le tasi o i laua e igoa ia Kaleopa; **“Pe na o oe ‘ea le aumau i Ierusalem, ma le le iloa o mea ‘ua tutupu ai i ona po nei”** ona tali atu lea o Iesu; **Po’o a mea?** Ua ia fa’amatala atu mea sa tutupu e uiga ia Iesu le Nasareta, o le perofeta sa malosi i mea uma na ia faia atoa ma ana upu uma i luma o le Atua ma le nu’u uma. O le Iesu lana na ave e le ‘au ositaulaga sili ma faipule ma fa’astauro ia te ia. Sa matou fa’amoemoe e na te togiolaina Isaraelu, fai mai ua tolu aso talu ona tutupu ia mea. A ‘ua matua ofo lava i le molimau a fafine sa i le tu’ugamau i le tafa o ata ma ‘ua vaa’ia ai le tu’ugamau tu’ufua, a ‘ua fa’aali le agelu e le o iinei ua toe soifua mai. Fetalai le Ali’i; O tagata valea ma le loto faigata ona talitonu i mea um aua fai mai ai le ‘au perofeta. Lea a e taumafai le Ali’i e fa’amatala atu mea na tutupu ma e tatau lava ona tiga le Keriso i mea uma fa’apena ona o’o ai lea i lona mamalu. Ona ia toe fa’amatala atu fo’i mea uma na tusia ia te ia i le tusi uma, ua amata mai ia Mose atoa ma le ‘au perofeta uma. Ua fa’alatalata atu i le aai, ua latou o iai, a’o le Ali’i e foliga a alu loa. A ‘ua la pulunaunau e nonofo ma ia aua ‘ua o’o i le afiafi. O le ulufale atu o Iesu i le fale sa saunia ai se taumafataga ona tago lea o ia i le areto ua fa’afetai ma ua tofitofi ma avatu ia te’i laua. O iina fa’atoa pupula ai o laua mata ma ‘ua la iloa o Ia ona mou ai lea o le Ali’i. Ua toe fetautalatalaa’i ma ua la manino o Iesu lava lea. Na o laua toe fo’i i Ierusalem ma talai atu i le to’a sefulu ma le to’atasi; E moni; Ua toetu le Ali’i. O le le talitonu o le ‘au so’o ia e to’alua na fa’apogisaina ai o laua mata. Fa’atoa iloa ai e i la’ua, e sa’o lava tala na fa’alogo iai, ma ‘ua talitonu ina ‘ua pupula o laua mata ma iloa atu Iesu toetu.

A’OA’OGA: 1. ‘Aua le masalosalo i mea e maua ai le manuia.

2. Ia talitonu pea i mea e fai mai ai nisi tagata, a lelei fa’aaoga ‘ae a leaga ‘aua le fa’aaogaina.

3. Ia tumau le ola talitonu ma fa’atuatua ia Iesu.

4. O le ola le talitonu, e atili fa’apogisaina ai le vaai o mata.

E lelei fo’i le fesili pea i tamaiti mo nisi a’oa’oga e mautinoa ai o lo’o malamalama i le mataupu o lenei Aso Sa. Vaai ane se pese e fetai ma le tatou mataupu e usu fa’atasi e le vasega. Ona fa’ai’u lea i le tatalo na a’oa’o mai e le Ali’i.

Manuia le alo atu i le Tapua’iga o lenei Aso Sa

////////////////////////////////////

ASO SA – ME 12, 2024 (ASO SA O TINA)

MATAUPU: “O TEPORA LE ULUA’I TINA NA FAI MA TA’ITA’I IA ISARAEU”

TUSI FAITAU: FA’AMASINO 4:4-10, 12-15

SINI: O le tina o le lima e fa’amafola mai ina ‘ia fai ma to’omaga o aiga,nu’u, malo ma atunu’u. O le tofia e avea ma ta’ita’i i se atunu’u o le ata vaa’ia lena o le Atua alofa fa’a tina.

TAULOTO: O ona po ia na fa’amasinoina ai Isaraelu e Tepora, o le perofeta fafine, o le ava lea a Lapitoka. (Fa’amasino 4:4)

FESOASOANI MO LE FAIAOGA: Tatou taunu’u i lenei Aso Sa ‘ua fa’apitoa mo tina. Manaia fo’i le talanoa pea i le taua o tina i totonu o aiga, nu’u, le atunu’u ma le galuega a le Atua. Taeao manuia, taeao maua ia tou susuga a faiaoga. Malo le onosa’i i galuega fa’agasolo o lenei taeao aua le feagai ai ma tiute fa’a faiaoga Aso Sa. Taua lava le amata i se tatalo e tofi se tama/teine e na te saunia, ona faitau ai lea o le Tusi faitau mo le matauu. Lelei fo’i ona fa’amalamalama ni upu e le’o manino ai fanau o lo’o i totonu o le faitauga. Manuia le fa’asoa mo fanau.

FESOASOANI MO LE MATAUPU: Talu ai o le Aso Sa lenei o le Aso o Tina. O le tatou mataupu o lenei taeao, **O Tepora le ulua’i tina na tofia e fai ma ta’ita’i o Isaraelu.** O lo’o atagia i le tala le le fa’aailoga lanu o le Atua aua o lea ua le na’o tama e fai ma ta’ita’i a’o lea fo’i ‘ua tofia Tepora e fai ma ta’ita’i i le nu’u. Fai mai sa avea Tepora ma fa’amasino tamaita’i muamua i le nu’u o Isaraelu. Fai mai ina ‘ua amioleaga le nu’u i luma o le Atua, ona tu’uina atu lea e le Atua i latou i lima o Iapino le tupu o Kanana o le na pule i Hasora. A’o avea Sesera ma pule o lana ‘au tau, na matua fa’asaua Iapino ma ana ‘au i le nu’u i tausaga e lua sefulu aua sa ia te ia o kariota u’amea e iva selau. Ona alalaga lea o le nu’u i le Atua mo se fesoasoani. Fai mai o ona po ia na fa’amasinoina ai Isaraelu e Tepora, o le perofeta fafine. Sa nofo i lalo o le pama o Tepora ma fai ai le fa’amasinoga o Isaraelu. Na omai le nu’u uma ma latou faia ai le filifiliga tatau ina ‘ua fa’amasinoina, ona aami lea e ia o Parako ma ia fai atu; E le’i poloa’i mai ea le Ali’i le Atua o Isaraelu, e te alu ma ta’i ‘au i le mauga o Tapora, tou te o ma tagata e sefulu afe o le fanauga a Nafatali ma le fanauga a Sepulona? Ou te tosina atu fo’i Sesera le ta’ita’i ‘au a Iapino ma ona kariota, atoa ma ana ‘au um ai le alia o Kisona, ma ou tu’uina fo’i o ia i lou lima. Ona tali atu lea o Parako ia Tepora,

afai ta te o, out e alu, ‘ae afai ta te le o, ou te le alu. Ona malie lea o Tepora e o ma Parako, ma lana tala na fai iai, E leai sou viiga Parako e maua i le mea e te alu ai oe, aua e tu’uina atu Sesera e le Ali’i i le lima o le fafine. Ua la o i Katesa fa’atasi ma le sefulu afe o tagata o le ituaiga o Sepulona ma Nafatali. Sa fa’atapeapeina e le Ali’i le itu taua a Sesera ma ana kariota ma ‘ua sola Sesera i ona vae (lona uiga ‘ua momo’e) ina ‘u taia e le Ali’i ana ‘au i le pelu ai luma o Parako. Le ta’ita’i fafine o Tepora sa fai ma tapasa o le si’i taua atu o le ‘au tau a Isaraelu e fa’ato’ilalo le itu taua a Sesera. O le tumau o lona loto i le fa’atonu mai o le Atua, na filifili ai e fai ma fa’amasino, fai ma perofeta e fa’amalosia Parako ina ‘ia fa’amoemoe i le Atua lona fesoasoani sili. O le ulua’i fafine na fai ma ta’ita’i ia Isaraelu. Manaia ia o lea tala aua e le na’o le tamaloa e au i le tulaga ta’ita’i, a’o le ata e iloa ai e le fa’ailoga tagata le Atua.

A’OA’OGA:

- 1. Ia manino lelei e tele fo’i le avanoa e fai ai tamaita’i/tina ma ta’ita’i.**
- 2. A valaa’uina loa e fa’ataunu’u se feau po’o se galuega alu lava ma le fa’atuatua i le Atua aua o ia e auai ma mafuta i le tagata.**
- 3. ‘Aua le manatu i le malosi ma mea ‘ua maua, ‘ae fesili po’o fea e afua mai ai ia mea.**
- 4. O le tina o le ata vaa’ia lea o le Atua i totonu o o tatou aiga, e tataua la ona ava ma fa’alogo iai.**
- 5. Manatua o filifiliga a le Atua o le filifiliga e tutusa ai tagata uma, e le fa’apito ‘ae tulaga tutusa.**

PESE: Filifili ane se pese e fetau lelei ma le tatou mataupu e usu fa’atasi uma iai.

TATALO: Ua fa’afetai tele le Atua mo la matou fa’asoa o lenei taeao, fa’amalamalama mai pea e lau Afio le uiga loloto o ia tala ia te’i matou. Fesoasoani i lo matou vaivai ma ia fa’amanuia a matou fanau nei. Fa’amagalo i matou i me aua matou sese ai, e ala ia Iesu le tatalo. Amene!

MANUIA LE ALO ATU I LE TAPUA’IGA I LE ATUA, MANUIA LE ASO TINA

////////////////////////////////////

ASO SA – ME 19, 2024

MATAUPU: “O SE TA’ITA’I LELEI, NA TE LAGONA LONA FA’ATAUVA’A”

TUSI FAITAU: 1 TUPU 3 : 4 - 15

SINI: E maua le lagona o le fa'atauva'a o le ta'ita'i, ina 'ua ia maua le lotomaulalo ma fa'amoemoe ma fa'alagolago i le fa'atonu folau mai o le Atua. E le taumateina le manuia o mea uma e ala i lana ta'ita'iga.

TAULOTO: "O lea ia e foa'i mai i lau auauna le loto matala ina ia fa'amasino e ia i lou nu'u, ma ia masino ai le lelei ma le leaga, aua po'o ai na te mafaia ona fa'amasino i lou nu'u nei ua matua toatele naua." (1 Tupu 4 : 9)

FESOASOANI MO LE FAIAOGA: Fa'atalofa atu fo'i i lenei taeao, malo le usu ma le fa'amalosi mo tiute fa'a faiaoga Aso Sa. Manatu lava e fa'atutu gata le usu, 'ae malo onosa'i ma alofa pea i fanau a le ekalesia. Manaia lava le amata i se tatalo saunia e lau susuga ona fa'agasolo ai lava lea o le tatou mataupu. Lelei fo'i 'ae faitau le Tusi Paia ma malamalama fanau i uiga o ni upu e le manino ai latou' Manuia le fa'asoa i fanau ma 'ia maua pea le iloa ma fiafia e fa'aloga i tala tau i le Atua.

FESOASOANI MO LE MATAUPU: O le tatou mataupu o lenei Aso Sa, **O se ta'ita'i lelei na te lagona lona fa'atauva'a.** Tele ta'ita'i iloga o lo'o ta'ua i le Tusi Paia, e o'o fo'i i malo ma atunu'u o le lalolagi. Ua iloga fo'i tala o ia ta'ita'i, ma latou ta'ita'iga, o nisi e ta'ita'i ma le alofa a'o isi e fa'asaua ma malosia a latou ta'ita'iga. Po'o le a lava la le ituaiga ta'ita'i e o'o iai le ta'ita'iga e tataua lava ona maua le loto alofa ma 'ia lagona lona fa'atauva'a, ona ta'ua lea o ia o le ta'ita'i lelei. Aumaia ai e fuaiupu ia na faitauina, le filifilia o Solomona e sui tulaga i lona tama o Tavita e fai ma tupu o Isaraelu. Manatua fo'i na lelei le tapu'eina e Tavita o le ola o lona atali'i na ia matua fai atu iai; Ia e fa'amalosi ma fa'atamatane. Fai mai le tala na fa'aali mai le Ali'i ia Solomona i le miti i le po, ma 'ua fetalai mai le Atua; Pe se a se mea ou te avatu ia te oe? Fai mai Solomona, na e alofa tele i lo'u tama o Tavita a'o fai ma tupu, sa savali i ou ala ma le fa'amaoni ma le amiotonu, i le ma le loto sa'o i ou luma; ua e tausia fo'i mona lenei alofa tele ua e foaiina mo ia le atali'i e nofo i lona nofoali'i, fa'apei ona faia i le aso nei. Solomona na lagona lona fa'atauva'a ma 'ua ia mautinoa e le feauga ia ma le silisili ese o le Atua. E iloa i ana upu na ia fai atu ai i le Atua, O a'u 'ua na'o se tamaititi, ou te leiloa ona ulufafo ma ulufale. O lau auauna fo'i o lo'o i luma o lenei nu'u tele ua e filifilia, e le masino ma le faitaulia. Ia e foa'i mai le loto matala ina 'ia fa'amasino e ia i lou nu'u, ina 'ia masino i le lelei ma le leaga, aua o ai e fa'amasino i lou nu'u nei 'ua matua to'atele. Fetalai mai lea o le Atua ia te ia, Ua e fa'atoga mai i lenei mea, a 'ua e le fa'atoga mai i le ola tulu'i, po'o le mauoa, po'o le fa'atoga mai ina ia oti i latou e ita ia te oe. A 'ua e fa'atoga mai

lava i lona loto matala e fa'amasino ai le nu'u, Ua talia e le Atua le augani a Solomona ma 'ua lke gata ina ave iai le pota ma le loto matala, a 'ua foa'i ai ma isi mea uma sa ia le ola atu ai i le Atua. O le fa'amanuia a le Atua aua ua silafia e le Atua lona fa'atauva'a ma le vaivai e ta'ua ai o le ta'ita'i. O le i'uga lona e o'o iai le tagata ta'ita'i pe a lagona lona le tutusa ma lona fa'atauva'a i luma o le Atua. Solomona na fa'alogi i fautuaga a lona tama o Tavita, lea fo'i ua ia mulimuli ma savali ai. A'o le mulimuli e fa'alagolago i le ta'ita'i mai o le agaga o le Atua, e mausali ai lona ta'u fa'atauva'aina.

AOAOGA:

1. Afai e tofia oe e fai ma ta'ita'i e tatau ona e lagonaina le loto maulalo ma lou fa'atauva'a
2. O a mea faigata ma mana'omia ai le ta'ita'iga a le Atua, ia ole atu ia te ia i le tatalo ma le anapogi.
3. Tausisi i fautuaga a matua ma usita'i i le fa'atonu folau mai o le Atua.
4. 'Aua le manatu se tasi i lona malosi ma ia fa'apea e faigofie mea uma ona fai.
5. O le tamaititi usita'i ma fa'alogi e pei o Solomona, e le fesiligia le i'u i se taunu'uga manuia.

PESE: Filifili ane se pese e fetauti lelei ma le tatou mataupu e usu fa'atasi, a ma'ea ona fa'ai'u lea i se tatalo e saunia e se tama po'o se teine e fa'auma ai le tatou fa'asoa o lenei taeao paia.

Manuia le Alo atu i le sauniga faitele o lenei Aso Sa



ASO SA – ME 26, 2024

MATAUPU FA'AMANATU MASINA O ME

FESOASOANI MO LE FAIAOGA: Malo le ala usu i lenei taeao, o le tatou fa'amanatu o lenei masina. Manaia lava le amata i le tatalo ona fai ai lea o sina review pu'upu'u ona amata ai lea o le fa'amanatu. O lo'o i lau susuga lava le faitalia e fai ai le suega fa'amanatu pau le meat aua ia maua pea le manatua e fanau o mataupu sa fa'asoa ai o lenei masina. O nai fesili na e fesoasoani i lau susuga mo le fa'amanatu. Manuia le fa'amanatu o lenei taeao.

Mataupu: "Ua fa'apogisaina mata o le talitonu."

Fesili: O fea fo'i le aai lea e aga'i iai tagata ia e to'alua?

Tali: O le aai o Emau.

Fesili: O a tala ia 'ua fetautalatalaa'i ai tagata ia e toalua e savavali aga'i i Emau?

Tali: O tala na fa'aloga iai; Ua toetu le Ali'i.

Fesili: Fai mai na fa'ate'ia le auali'i lea i le talanoa atu o le tagata ia te'i la'ua, o le a le mea na tupu i le to'alua lea?

Tali: Sa fa'apogisaina o la'ua mata ma 'ua la le iloa ai o Iesu lea ua lkatou savavali i le ala.

Fesili: O le a se mea na fai e Iesu na fa'atumauiina ai le talitonu o tagata ia o Iesu moni lava lea?

Tali: O le taimi na taoto ai e aai, na tago ai Iesu i le areto 'ua tofitofi ma tufa atu ia te il aua.

Mataupu: "O Tepora le ulua'i tina na fai ma ta'ita'i ia Isaraelu."

Fesili: O le a fo'i le isi tofiga o Tepora?

Tali: O le fa'amasino.

Fesili: O ai fo'i le igoa o le tupu o Kanana na tu'uina atu iai Isaraelu e le Atua ina 'u amioleaga ia te ia?

Tali: O Iapino.

Fesili: O fea na fai ai le fa'amasinoga o le nu'u e Tepora?

Tali: Na fai i lalo o le pama o Tepora i le va o Rama ma Peteli, i le mauga o Efaraima.

Fesili: O ai le igoa o le tamaloa na aami e aTepora e sau e fai e ta'ita'i 'au a Isaraelu?

Tali: O Parako.

Fesili: E to'afia le 'au tau a Isaraelu na o ma Parako ma Tepora?

Tali: E sefulu afe tagata o nle ituaiga o Sepulona ma Nafatali.

Mataupu: "O se ta'ita'i lelei, na te lagona lona fa'atauva'a"

Fesili: O ai tupu ia e ta'ua i le tala lea?

Tali: O Tavita ma Solomona.

Fesili: Ina ‘ua fa’aali le Atua ia Solomona i le miti, O le a le mea na mana’o ai Solomona mai le Atua?

Tali: O le foa’i mai o le loto matala e fa’amasino ai le nu’u.

Fesili: O a fo’i upu a Solomona na fai i le Atua e iloa ai lona fa’atauva’a tele?

Tali: O a’u ‘ua na’o se tamaititi out e leiloa ona ulufafo ma ulufale.

Fesili: Afai o lagona ia o Solomona, O le sou iloa sa fa’alogo le tama i lona tama?

Tali: Ioe, aua na atagia i lana tali atu i le Atua.

Manuia fo’i ‘ae toe fa’amanatu tatou tauloto ma pese sa avatu o lenei masina. Manuia le Tapua’iga o lenei Aso Sa ma le alo atu i malologa fa’a sapati.

ASO SA – IUNI 02, 2024

MATAUPU: “A VALA’AUINA OE E LE ATUA, TULA’I MA ALU LOA”

TUSI FAITAU: IEREMIA 1 : 1 – 19

SINI: O tofiga a le Atua, o le vala’auina lava lea o le tagata e fai ma avefeau na te tala’iina lona finagalo. O le vala’au e le tatau ona tete’e iai se tasi, a vala’au loa le matai alu loa ma le fiafia.

TAULOTO: Na ‘au iloa oe a’o le’i faia oe e a’u i le manava; na a’u fa’apaiaina oe a o le’i fanau mai oe, na a’u tofia oe e fai ma perofeta i nu’u. Ona a’u fai atu lea, Aue, le Ali’i e, le Atua, fa’auta, ou te leiloa ona tautala, aua o a’u ua na’o se tamaititi.” (Ieremia 1: 5,6)

FESOASOANI MO LE FAIAOGA: Fa’amalo lava le onosa’i, ma le lava papale i le ala usu fo’i aua le fa’ataunu’uina o le aoga Aso Sa. Fa’atutu gata a le taeao, ‘ae manatu lava o lo’o maua pea le ‘augofie e fa’atino ai pea le ‘au’aunaga fa’a faiaoga Aso Sa. Amata pea i se tatalo pu’upu’u ona fa’agasolo ai lava lea o le mataupu o lenei taeao. Manuia le fa’asoa.

FESOASOANI MO LE MATAUPU: O le vala’auina o se tagata e fa’ataunu’u se galuega e tatau lava ona maua le onosa’i e talia ai aemaise lava pe afai o se vala’auina e maua ai se tau i lelei. E fai si eseese o le vala’au fa’a le lalolagi ma le vala’au a le Atua i le tagata, aua e vala’au le Atua ma ‘ua mautinoa lava le auai o le Atua i fa’atinoga uma. O le vala’auina o Ieremia e fai ma perofeta, o le vala’au na le mautonu ai Ieremia. Ua iloa e Ieremia, fa’apefea

ona vala'auina ia, a'o ia 'ua na'o se tamaititi. O iinei e iloa ai e ese a tofiga a le tagata ese tofiga a le Atua. Taumafai Ieremia e fa'ailoa pea lona lava le feauga ma le finagalo vala'au o le Atua. Peita'i, na fa'amalosia o ia ina 'ua fetalai iai le Atua; **Na ou iloa oe a'o le'i faia oe e a'u ai le manava; na 'ou fa'apaiaina oe a'o le'i fanau mai oe; na a'u tofia oe e fai ma perofeta i nu'u.** Na faigata ona gaua'i atu le loto o Ieremia i le fetalaiga a le Atua, aua 'ua ia mautinoa e le mafai ona tautala. Ua toe fetalai atu le Atua, 'Aua e te fa'apena, ou te ia te oe i mea uma e te alu iai. Ou te leoleo ia te oe i ala uma e te savali ai. Ua ia pa'i fo'i i le gutu o Ieremia ma tu'u iai upu e tautala ai. O le mea lea na malosi ai lona loto e avea ma perofeta e fai ma fofoga o le Atua mo le nu'u. Na tapena lava e le Atua le malosi lilo mo le perofeta, O le vala'auina na vala'au e le Atua e le alu ese ai le ta'ita'iga a le Atua. O le mea lea na malosi ai Ieremia e tali le vala'au, ina ua ia mautinoa o le galuega o le a ia alo atu iai, e leai sona malosi e fai ai. A'o lea 'ua ia maua le malosi e fai ai le galuega, o mea uma ua ia sauni atu iai e i'u i lona manumalo mai ai. O le taua lena o le tali vala'au, ma 'aua le masalosalo e vala'au le Atua ma mafuta i le ua ia vala'auina. A vala'au le tagata e tataua ona tu'u fesilisili, 'ae a vala'au le Atua ia tula'i ma alu loa. E iai le Atua i mea uma 'ua ia finagalo iai.

A'OA'OGA"

- 1. Aua le fa'alologolo leo, aemaise lava pe a vala'au le Atua, ia tu ma alu loa.**
- 2. A fa'alagolago i le Atua, e faigofie mea fai uma.**
- 3. E leai se mea e faigata pe a tu'u le Atua i luma.**
- 4. O le le tali vala'au o le le talia fo'i lea o le Atua.**
- 5. Ia ava i matua ma tagata matutua, e manuia ai ma umi ai aso o le ola.**

PESE: Ou te tula'i ma savali, e ta'u atu lou suafa,

E logo atu le tala i le mata'utia o lou mana,

Fa'ailoa i au uo, ua na'o ia le ala,

Iesu e o le fa'aolataga.

TATALO: Le Atua e, fa'afetai i lou vala'auina o i matou e fai ma avefeau o lau talalelei. Viia lou suafa ona o lau tausiga ia matou fanau, fa'amagalalo o matou sese uma lava. Ia maua poea le agaga fiafia e talatala ai tala o lau afio i fanau. Ona o Iesu lo matou Ali'i vala'au mai pea. Amene.

Manuia le alo atu i le tapuaiga o lenei Aso Sa!

naunautaiga o Ioane, ia tumau tatou i le fa'amaoni e molimau i le Ali'i o Iesu. E fa'amaoni le Ali'i ma e fiafia ina 'ua tatou fa'amaoni e molimau mo Ia.

A'OA'OGA:

1. 'Aua le molimau pepelo, ta'u le mea moni.
2. Soia le ola fa'a foliga ma augata e molimau ma le fa'amaoni.
3. 'Aua le se'etia gofie i a'oa'oga sese a isi, 'ae tumau ma talitonu pea i le Atua.
4. E le fiafia le Atua i le tagata e molimau pepelo.
5. Fa'ailoa i le Atua a tatou agasala aua o ia lava e fa'amagaloina mai.

PESE: Pese ma Viiga (146)

Sauni ane e lau susuga se tatalo e fa'ai'u ai la tatou mataupu. Manuia le Aso Sa.

ASO SA – IUNI 16, 2024 (ASO SA O TAMA)

MATAUPU: "IA FA'ATINO LOU ALOFA AE LE NA'O UPU"

TUSI FAITAU: 1 IOANE 3 : 18 – 24

SINI: Fa'amanino lelei i tamaiti le alofa fa'atino, o le alofa e o fa'atasi ma galuega. E le pei o le alofa upu, na'o tala ae leai se fa'atinoga e iloa ai le alofa. O le alofa fa'atino na amata mea ai le Atua.

TAULOTO: Fa'auta i le silisili o le alofa 'ua foaiina mai e le tama ia te'i tatou, 'ina 'ua tau ai tatou o fanau a le Atua; o le mea lea e le iloa ai i tatou e le lalolagi, aua na te leiloa o ia. (1 Ioane 3 : 1)

FESOASOANI MO LE FAIAOGA: Fa'afeiloa'i atu fo'i i lenei Aso Sa i le alofa ma le agalelei o le Atua i lo outou soifua ma lo tatou ola. Ua fa'amalo le galulue fa'afetai le pale i feau ma galuega o lo'o feagai ai pea ma outou i aso ta'itasi. Ae o le fa'amalosi lava ina ia sologa manuia la tatou pito laau tauave, ae a le manuia o fanau mo le lumana'i ma lo latou ola fa'a le agaga. Ia amata i se tatalo ona fa'aavanoa mo le faitauina o le tusi faitau o le mataupu ua tu'uina atu. Ia manuia le fa'asoa i fanau.

FESOASOANI MO LE MATAUPU: Ua tatou taunu'u i le Aso Sa fa'apitoa mo o tatou tama. O le aso e fa'amanatuina ai le taua o tama i aiga, nu'u, aemaise le galuega pele a le Atua. Fai mai le Autu o la tatou mataupu o lenei Aso Sa; **Ia fa'atino lou alofa 'ae le na'o**

upu, Lona uiga e le o upu a’o galuega, aua e leotele atu galuega nai lo upu. E leai fo’i se aoga e tele ai upu ‘ae leai se fa’atinoga lelei o iai. Ua aumai ai e Ioane le feau manaia ina ia savavali ma ola ai kerisiano o lona vaitau. O ana upu fa’amalosi ina ‘ia tumau pea loto o tagata i le Atua, ma ‘aua ne’i galo o le Atua na mua’i alofa mai. O le alofa na fa’atino i le soifua paia o lona alo pele e to’atasi, E le na ona alofa mai i upu ‘ae sa ia faia le leleiga, lona alofa ‘ua ta’ua ai i tatou o lana fanau. Le mea fo’i le o lo’o taumafai Ioane e fa’ailoa atu, ona ‘ua tu’uina mai e Iesu lona ola e sui ai tatou. E tatau fo’i ona tatou faia le tu’uina atu o o tatou ola ina ia sui ai le ‘au uso mafatia. Ia mautinoa e le uso mauoa pe a iloa atu e ia lona uso ‘ua mativa ‘ae le alofa iai, sea le aoga e fai ane ai i le alofa o le Atua, ma ailoga e tumau len alofa o le Atua i lea tagata? Lea e malie ai ana upu ia; **La’u fanau e, ‘aua ne’i tatou alolofa tau o le upu ma le gutu, a’o le amio ma le fa’amaoni.** O le manatu o le toeaina ‘ia le na’o upu ma tala, a ‘ia faia na ai o le soifua fa’atino, e ala i le foa’i atu ma le fiafia mo isi. Afai tatou te ola i mea ia ua fa’amanatu mai e Ioane, ua tatou mautinoa ai le upu moni ma ‘ua tatou loto atu i le Atua. O le manaia lona o a’oa’oga a si toeaina o Ioane, e toe fagufagu mai pea ia i tatou le ola e tatau ona tatou ola tumau ai. O le ola i fa’atinoga ma galuega, fa’a lapoa le galuega ‘ae fa’a laititi upu ma tala, ona le mavae lea o le tausiga alofa a le Atua ia i tatou.

A’OA’OGA:

- 1. Fa’alaiti upu ma fa’apupu’u, ‘ae fa’a tele le fa’atinoga.**
- 2. Aua le maumauina le taimi e fa’aalu vale ai le savili pe a leai se alofa fa’a le uso.**
- 3. Ia matamau ae aua le mata ū.**
- 4. Manatua le Atua na alofa mai ma ia faia le fa’atinoga e le mafai e se isi lava ona fai.**
- 5. Mulimuli i tulaga aao o le Atua e manuia ai ma tele ai fa’amanuiaga e maua e fa’asoa atu i e mana’omia.**

PESE: Filifili ane se pese e fetau ma le tatou mataupu, aemaise le aso fa’apitoa mo fanau, a maea ona fai fa’atasi lea o le tatalo a le Ali’i e fa’ama’ea ai la tatou mataupu.

Manuia saumiga o le Aso Sa o Tama



ASO SA – IUNI 23, 2024

MATAUPU: “O LE LEOLEO MAMOE LELEI”

TUSI FAITAU: IOANE 10 : 7-16

SINI: Ia manino lelei tamaiti o Iesu le leoleo mamoe lelei, aua o lo’o ia leoleo ia te’i tatou. O ia fo’i o le faitoto’a e ulufale atu ai mamoe i le ola e fa’avavau.

TAULOTO; Ona toe fetalai atu lea o Iesu ia te’i latou, E moni, e moni, ‘ou te fai atu i a te outou, o a’u nei o le faitrotoa o mamoe. (Ioane 10:7)

FESOASOANI MO LE FAIAOGA: Ua fa’amalo le folau, fa’afetai taupata e tusa ma lo outou vala’auina i tiute ma faiva eseese o lo’o outou galulue ai. E le taumate le tele o faigata o le tau fa’atinoina o le galuega fa’a faiaoga Aso Sa i le afa muamua o lenei tausaga. Peita’i, e le tu’ulafoaina a tatou e le Atua. O le mea lea e alaga tatau ai ona tatou fa’afetai ‘ae pea i le Atua aua o ia o lo tatou ta’ita’i malaga sili. E ui lava o le Aso Sa mulimuli lenei o a tatou mataupu a’o lumana’i ai le toe Aso Sa mo le tatou fa’amanatu o lenei afa tausaga. ‘Ae tatou fa’amalolosi pea e fa’ato’aga ona fai a tatou su’esu’ega i le tusi faitau ua tu’uina atu. Ia manuia tele tapenaga.

FESOASOANI MO LE MATAUPU: Ua masani le fa’alogo o Iesu le leoleo mamoe lelei. O le leoleo e mataala i le leoleoina o ana mamoe. Ua fa’amatala ai e Ioane le fa’ataoto i le leoleo mamoe, fai mai o le le ui atu i le faitoto’a, o le gaoui ma le faomea. A’o le ui atu i le faitotoa o le leoleo mamoe lava lea, e tatala mai e le leoleo le faitoto’a. E fa’alogo mamoe i lona leo e muamua ‘ae mulimuli uma atu ai mamoe. Molimau a Ioane, na fetalai atu Iesu i lona fa’ataoto ‘ae leai ma se tasi e malamalama ai. Ona toe fetalai atu lea o Iesu, E moni, e moni, out e toe fai atu ia te outou; O a’u nei o le faitoto’a o mamoe. O e uma e muamua ia te a’u, o tagata gaoui ma le faomea. E le mafai ona fa’alogo iai mamoe. Na ia toe fa’apea atu, O a’u nei o le faitoto’a, a’o le faitoto’a e tau atu i le ola ma fa’aolaina ai le tagata pe a ui atu ai. E ulufafo ma le fiafia ma maua e ia ana mea e ‘ai. O le gaoui fo’i na ona sau e fasi ma fa’aumati’a, a’o a’u o le leoleo mamoe lelei, e tu’uina atu e ia lona ola e sui ai ana mamoe. Ese mai le a’ua’una e sola pe a omai manu feai e osofa’i mamoe, aua e le popole iai e le o ni ana mamoe. E le manatu o ia o se leoleo mamoe lelei, a’o a’u (o la Iesu lea) o le leoleo mamoe lelei. ‘ua ou iloa a’u mamoe ‘ua iloa fo’i a’u e a’u mamoe, e tatau ona ‘ou ta’ita’ina mai latou aua e fa’alogo i latou i lo’u leo. O le leoleo mamoe e naunau i mamoe, lea fo’i ‘ua ia maua isi mamoe ma ‘u ta’ita’iina mai i totonu o le pa mamoe. Ma ‘ua tasi ai le lafu mamoe, tasi fo’i le leoleo mamoe, ‘ua na’o Iesu lava. Le leoleo mamoe lelei na ia sui tulaga mo ana mamoe. Le finagalo alofa lona o le Atua, na ia auina ifo ai le tama’i mamoe e fai ma fa’aola i le lalolagi o tagata agasala. Le leoleo mamoe lelei lona lea ua ia aumaia le fa’avae o le ola

fo'u mo mamoe galala i loe fia aai ma fia feinu i le agaga paia. O ai la se le fia avea Iesu ma ona leoleo? Tatou fiafia la'ia, e tala'i atu le Ali'i, aua o Ia o le leoleo mamoe lelei.

A'OA'OGA

- 1. Ia manatua pea o Iesu le leoleo sili e mapu ma to'a iai le tagata mafatia.**
- 2. 'Aua le fa'alogo i isi leoleo mamoe e ta'ita'ina sese ai le tagata i le malaia.**
- 3. 'Aua le ui i le fa'amalama aua e ta'ua ai oe ma a'u o le tagata gaoui, taumafai pea e ui i le faitoto'a.**
- 4. A osofa'ia tatou e le fili ma fa'asolo atu ai ina sese a tatou fa'ai'uga e fai, 'ia taula pea loto ia Iesu le leoleo mamoe lelei.**
- 5. Fesili pea i tamaiti po'o le a se a'oa'oga ua latou maua mai le tala sa fa'amatala.**

PESE: Le leoleo mamoe lelei

Ua e alofa I au mamoe

E te alu atu ma saili

Faafuata ma le olioli. (olioli..)

Tali – E ui lava ina ou savali, I le vanu o le oti

E te saili mai, ma faaola i ate au.....

TATALO: Fa'afetai le Atua ua ma'ea le fa'asoa o lenei taeao, fa'amalamalama mai pea e lou agaga le uiga loloto o tala tau i lau Afio. Fa'amanuia fanau, ma tausia i latou uma i ou a'ao alofa. Fesoasoani i lo matou vaivai ma fa'amagalo a matou agasala uma lava. Ona o Iesu le Ali'i leoleo mamoe lelei. Amene.

Manuia le alo atu i sauniga o lenei Aso Sa

////////////////////////////////////

ASO SA – IUNI 30, 2024

MATAUPU FA'AMANATU MASINA O IUNI

SU'EGA FA'AI'U O LENEI AFA MUAMUA O LE TAUSAGA

SINI: Ia maua pea e fanau le su'esu'eina o le mafaufau ma manatua pea tala sa fa'asoa ai mo lenei masina. Ia aoga fo'i e fa'amasani ai latou e tali fesili o mataupu ta'itasi. Manuia le su'esu'eina o mataupu e fanau i lenei taeao.

FESOASONI MO LE FAIAOGA: Ua tatou o’o mai i le fa’ai’uga o a tatou galuega o lenei afa muamua o le tausaga. Ua moni ai upu o le seuga a Ulumu ma Lefaoeseu; ‘Ua se togi le seu na lagatila, ua fa’apulou le tualima, se ua fa’amalo fai o le faiva. E ui a i le tele o faigata sa feagai ma a outou susuga fa’apea fo’i ona tagata. ‘Ae fa’afetai i le Atua sa fai ma o tatou ta’ita’i malaga i le tatou folauga lea ua tuta ai i nu’u lelei lo tatou sa folau i lenei afa tausaga. ‘Ae alo ane e fa’atino la tatou fa’amanatu o lenei taeao, ia agalelei le Atua maua pea lo outou soifua manuia. Manuia le su’ega.

1. “A vala’auina oe e le Atua, tula’i loa ma alu”

Fesili: O ai fo’i lea e vala’au iai le Atua i le tala?

Tali: O Ieremia.

Fesili: O le a fo’i le tali a Ieremia i le Atua, ina ‘ua vala’au iai le Atua?

Tali: O a’u ‘ua na’o se tamaititi, ou te leiloa ona tautala.

Fesili: A’o le a le fetalaiga a le Atua ia Ieremia ina ‘ua fai i le Atua e leiloa tautala?

Tali: Ou te tu’u upu i lou gutu.

2. “Ia tatou fa’amaoni e avea ma molimau a Keriso”

Fesili: O le a le manaoga o le toaina o Ioane mo kerisiano o lona vaitau?

Tali: Ia tumau i le fa’atuatua i le Atua, ma talitonu pea ia Iesu le Ali’i o le talalelei.

Fesili: O le a le mea lea e taumafai Ioane e toe fa’amantu atu i le ‘au kerisiano?

Tali: O le Upu sa i le amataga, O iesu le Upumoni lava lea.

Fesili: O ai ia e fa’alavelave i a’oa’oga a Ioane?

Tali: O Faiaoga tau fa’a sese.

3. “Ia fa’atino lou alofa ‘ae le na’o upu”

Fesili: O le a fo’i le manaoga o Ioane ‘ia faia e le tagata?

Tali: Fa’atino le alofa ‘ae le na’o upu.

Fesili: O le a fo’i le mau a le atunu’u i le soifua fa’atino?

Tali: E le’o upu a’o galuega/ E leotele galuega i lo upu.

Fesili: O le a le fa’ata’ita’iga na faia e Iesu i le ola foa’i?

Tali: O le ofoina o lona ola e fai ma Togiola o le tagata agasala.

Fesili: O le a le uiga o le ola foa'i i le manatu o Ioane?

Tali: O le loto atu i le Atua.

4. "O le leoleo mamoe lelei"

Fesili: O ai le leoleo mamoe lelei e pei ona aumaia e Ioane.

Tali: O Iesu

Fesili: Fetalai Iesu, O le le ui mai i le faitoto'a, O ai lena?

Tali: O le gaoi ma le faomea.

Fesili: O lo'o fa'atusa e Ioane, Iesu i le a?

Tali: O le Faitoto'a.

Fesili: O le a le manatu o Iesu i le tagata gaoi?

Tali: O le tagata lena na o le sau e fasi ma fa'aumatia 'ae le alofa i mamoe.

Fesili: O le a le mea e tupu i mamoe pe a alaga le leoleo mamoe?

Tali: E fa'alogi i lona leo ma mulimuli iai.

Fa'aopoopo ane e lau susuga nisi fesili, ia atonu e iai fo'i se isi Faiga e te silafia e fai ai le tatou su'ega. Fa'amalo le onosa'i i tiute fa'a faiaoga Aso Sa. Manuia le malologa tatou toe feiloa'i i le afa mulimuli o lena tausaga. Manuia sauniga o le Aso Sa.

MANUIA TELE LE ALO ATU O LE EKALEZIA I LANA FONOTELE – 2024.

